

全唐诗卷一百三十九

卷 139_1

【临江亭五咏】储光羲

晋家南作帝，京镇北为关。
江水中分地，城楼下带山。
金陵事已往，青盖理无还。
落日空亭上，愁看龙尾湾。
山横小苑前，路尽大江边。
此地兴王业，无如宋主贤。
潮生建业水，风散广陵烟。
直望清波里，只言别有天。
城头落暮晖，城外捣秋衣。
江水青云挹，芦花白雪飞。
南州王气疾，东国海风微。
借问商歌客，年年何处归。
古木啸寒禽，层城带夕阴。
梁园多绿柳，楚岸尽枫林。
山际空为险，江流长自深。
平生何以恨，天地本无心。
京山千里过，孤愤望中来。
江势将天合，城门向水开。
落霞明楚岸，夕露湿吴台。
去去无相识，陈皇安在哉。



卷 139_2

【钱张七琚任宗城即环之季也同产八人俱以才名知】储光羲

他日曾游魏，魏家馀趾存。
可怜宫殿所，但见桑榆繁。
此去拜新职，为荣近故园。
高阳八才子，况复在君门。

卷 139_3

【留别安庆李太守】储光羲

明牧念行子，又言悲解携。
初筵方落日，醉止到鸣鸡。
过客来自北，大军居在西。
丘家如讨逆，敢以庶盘溪。

卷 139_4

【洛阳东门送别】储光羲

东城别故人，腊月迟芳辰。
不惜孤舟去，其如两地春。

花明洛阳苑，水绿小平津。
是日不相见，莺声徒自新。

卷 139_5

【汉阳即事】储光羲

楚国千里远，孰知方寸违。
春游欢有客，夕寝赋无衣。
江水带冰绿，桃花随雨飞。
九歌有深意，捐佩乃言归。

卷 139_6

【泊江潭贻马校书】储光羲

明月挂青天，遥遥如目前。
故人游画阁，却望似云边。
水宿依渔父，歌声好采莲。
采莲江上曲，今夕为君传。

卷 139_7

【送沈校书吴中搜书】储光羲

郊外亭皋远，野中岐路分。
苑门临渭水，山翠杂春云。
秦阁多遗典，吴台访阙文。
君王思校理，莫滞清江滨。

卷 139_8

【寒夜江口泊舟】储光羲

寒潮信未起，出浦缆孤舟。
一夜苦风浪，自然增旅愁。
吴山迟海月，楚火照江流。
欲有知音者，异乡谁可求。

卷 139_9

【苑外至龙兴院作】储光羲

朝游天苑外，忽见法筵开。
山势当空出，云阴满地来。
疏钟清月殿，幽梵静花台。
日暮香林下，飘飘仙步回。

卷 139_10

【题虬上人房】储光羲

禅宫分两地，释子一为心。
入道无来去，清言见古今。
江寒池水绿，山暝竹园深。
别有中天月，遥遥散夕阴。



卷 139_11

【咏山泉（一作题山中流泉）】储光羲

山中有流水，借问不知名。
映地为天色，飞空作雨声。
转来深涧满，分出小池平。
恬澹无人见，年年长自清。

卷 139_12

【贻主客吕郎中（即皇太子赞谕）】储光羲

上士既开天，中朝为得贤。
青云方羽翼，画省比神仙。
委佩云霄里，含香日月前。
君王傥借问，客有上林篇。

卷 139_13

【京口留别徐大补阙赵二零陵】储光羲

皇州月初晓，处处鼓钟喧。
树出蓬莱殿，城开阊阖门。
近臣朝琐闼，词客向文园。
独有三川路，空伤游子魂。

卷 139_14

【答王十三维】储光羲

门生故来往，知欲命浮觞。
忽奉朝青阁，回车入上阳。
落花满春水，疏柳映新塘。
是日归来暮，劳君奏雅章。



卷 139_15

【奉和中书徐侍郎中书省玩白云寄颖阳赵大】储光羲

青阙朝初退，白云遥在天。
非关取雷雨，故欲伴神仙。
泛滟陂池曲，飘飘琐闼前。
犹多远山意，幸入侍臣篇。

卷 139_16

【和张太祝冬祭马步】储光羲

故坛何肃肃，中野自无喧。
烈火见陈信，飏言闻永存。
房星隐曙色，朔风动寒原。
今日歌天马，非关征大宛。

卷 139_17

【祭风伯坛应张太祝作】储光羲

圣主御青春，纶言命使臣。
将修风伯祀，更福太平人。
帘幕宵联事，坛场晓降神。
帝心矜动物，非为属车人。

卷 139_18

【寻徐山人遇马舍人】储光羲

泊舟伊川右，正见野人归。
日暮春山绿，我心清且微。
岩声风雨度，水气云霞飞。
复有金门客，来参萝薜衣。

卷 139_19

【夜观妓】储光羲

白雪宜新舞，清宵召楚妃。
娇童携锦荐，侍女整罗衣。
花映垂鬟转，香迎步履飞。
徐徐敛长袖，双烛送将归。

卷 139_20

【洛桥送别】储光羲

河桥送客舟，河水正安流。
远见轻桡动，遥怜故国游。
海禽逢早雁，江月值新秋。
一听南津曲，分明散别愁。

卷 139_21

【秦中送人觐士】储光羲

二月清江外，遥遥饯故人。
南山晴有雪，东陌霁无尘。
骑别章台晚，舟行洛水春。
君梁苑去，日见白华新。

卷 139_22

【洛中送人还江东】储光羲

洛城春雨霁，相送下江乡。
树绿天津道，山明伊水阳。
孤舟从此去，客思一何长。
直望清波里，唯馀落日光。

卷 139_23

【送姚六昆客任会稽何大蹇任孟县】储光羲

越城临渤海，晋国在河汾。
仙绶两乡意，青郊一路分。



野棠春未发，田雀暮成群。
他日思吴会，尝因西北云。

卷 139_24

【洛潭送人覲士】储光羲

清洛带芝田，东流入大川。
舟轻水复急，别望杳如仙。
细草生春岸，明霞散早天。
送君唯一曲，当是白华篇。

卷 139_25

【送人随大夫和蕃】储光羲

西方有六国，国国愿来宾。
圣主今无外，怀柔遣使臣。
大夫开幕府，才子作行人。
解剑聊相送，边城二月春。

卷 139_26

【仲夏饯魏四河北覲叔】储光羲

落日临御沟，送君还北州。
树凉征马去，路暝归人愁。
吴岳夏云尽，渭河秋水流。
东篱摘芳菊，想见竹林游。

卷 139_27

【送人寻裴斐】储光羲

柱史回清宪，谪居临汉川。
迟君千里驾，方外赏云泉。
路断因春水，山深隔暝烟。
湘江见游女，寄摘一枝莲。

卷 139_28

【陇头水送别】储光羲

相送陇山头，东西陇水流。
从来心胆盛，今日为君愁。
暗雪迷征路，寒云隐戍楼。
唯馀旌旆影，相逐去悠悠。

卷 139_29

【送王上人还襄阳】储光羲

朝看法云散，知有至人还。
送客临伊水，行车出故关。
天花满南国，精舍在空山。
虽复时来去，中心长日闲。



卷 139_30

【官庄池观竞渡】储光羲

落日吹箫管，清池发棹歌。
船争先后渡，岸激去来波。
水叶藏鱼鸟，林花间绮罗。
踟蹰仙女处，犹似望天河。

卷 139_31

【重寄虬上人】储光羲

一作云峰别，三看花柳朝。
青山隔远路，明月空长霄。
鹄浴西江雨，鸡鸣东海潮。
此情劳梦寐，况道双林遥。

卷 139_32

【蓝上茅茨期王维补阙】储光羲

山中人不见，云去夕阳过。
浅濑寒鱼少，丛兰秋蝶多。
老年疏世事，幽性乐天和。
酒熟思才子，溪头望玉珂。

卷 139_33

【大酺得长字韵时任安宜尉】储光羲

大道启元命，时人居太康。
中朝发玄泽，下国被天光。
明诏始端午，初筵当履霜。
鼓鼙迎爽气，羽籥映新阳。
太守即悬圃，淮夷成葆疆。
小臣惭下位，拜手颂灵长。



卷 139_34

【同张侍御鼎和京兆萧兵曹华岁晚南园】储光羲

公府传休沐，私庭效陆沉。
方知从大隐，非复在幽林。
阙下忠贞志，人间孝友心。
既将冠盖雅，仍与薜萝深。
寒变中园柳，春归上苑禽。
池涵青草色，山带白云阴。
潘岳闲居赋，钟期流水琴。
一经当自足，何用遗黄金。

卷 139_35

【奉酬张五丈垂赠】储光羲

彩服去江汜，白云生大梁。
星辰动异色，羔雁成新行。
日望天朝近，时忧郢路长。
情言间邁轴，惠念及沧浪。
松柏以之茂，江湖亦自忘。
贾生方吊屈，岂敢比南昌。

卷 139_36

【秦中守岁】储光羲

众星已穷次，青帝方行春。
永感易成戚，离居难重陈。
阖门守初夜，燎火到清晨。
或念无生法，多伤未出尘。
广庭日将晏，虚室自为宾。
愿以桑榆末，常逢甲子新。

卷 139_37

【献高使君大酺作】储光羲

肃穆郊禋毕，工歌赏事并。
三朝遵湛露，一道洽仁明。
布德言皆应，无为物自成。
花添罗绮色，莺乱管弦声。
独有同高唱，空陪乐太平。

卷 139_38

【荥阳马氏二子】储光羲

圣君封太岳，十月建行旂。
辇路开千里，寒云霁九天。
故人多侍从，二子留伊川。
河兗冰初合，关城月屡圆。
暝过荥水上，闻说郑卿贤。
材蔽行人右，名居东里先。
制岩开别业，桑柘亦依然。
待至金园侧，相将居一廛。

卷 139_39

【观竞渡】储光羲

大夫沉楚水，千祀国人哀。
习棹江流长，迎神雨雾开。
标随绿云动，船逆清波来。
下怖鱼龙起，上惊凫雁回。
能令秋大有，鼓吹远相催。

卷 139_40

【太学贻张筠】储光羲



壁池忝门子，俄顷变炎凉。
绿竹深虚馆，清流响洞房。
园林在建业，新友去咸阳。
中夜鼓钟静，初秋漏刻长。
浮云开太室，华盖上明堂。
空此远相望，劳歌还自伤。

卷 139_41

【田家即事】储光羲

桑柘悠悠水蘸堤，晚风晴景不妨犁。
高机犹织卧蚕子，下坂饥逢饷饁妻。
杏色满林羊酪熟，麦凉浮垄雉媒低。
生时乐死皆由命，事在皇天志不迷。

卷 139_42

【洛阳道五首献吕四郎中】储光羲

洛水春冰开，洛城春水绿。
朝看大道上，落花乱马足。
剧孟不知名，千金买宝剑。
出入平津邸，自言娇且艳。
大道直如发，春日佳气多。
五陵贵公子，双双鸣玉珂。
春风二月时，道傍柳堪把。
上枝覆官阁，下枝覆车马。
洛水照千门，千门碧空里。
少年不得志，走马游新市。



卷 139_43

【同武平一员外游湖】储光羲

竹吹留歌扇，莲香入舞衣。
前溪多曲渚，乘兴莫先归。

卷 139_44

【长安道】储光羲

鸣鞭过酒肆，袷服游倡门。
百万一时尽，含情无片言。
西行一千里，暝色生寒树。
暗闻歌吹声，知是长安路。

卷 139_45

【江南曲四首】储光羲

绿江深见底，高浪直翻空。
惯是湖边住，舟轻不畏风。
逐流牵荇叶，缘岸摘芦苗。

为惜鸳鸯鸟，轻轻动画桡。
日暮长江里，相邀归渡头。
落花如有意，来去逐船流。
隔江看树色，沿月听歌声。
不是长干住，那从此路行。

卷 139_46

【关山月】储光羲

一雁过连营，繁霜覆古城。
胡笳在何处，半夜起边声。

卷 139_47

【玉真公主山居】储光羲

山北天泉苑，山西凤女家。
不言沁园好，独隐武陵花。

卷 139_48

【沧浪峡（一作储嗣宗诗）】储光羲

沧浪临古道，道上若成尘。
自有沧浪峡，谁为无事人。

卷 139_49

【奉真观】储光羲

真门迥向北，驰道直向西。
为与天光近，云色成虹霓。

卷 139_50

【明妃曲四首】储光羲

西行陇上泣胡天，南向云中指渭川。
毳幕夜来时宛转，何由得似汉王边。
胡王知妾不胜悲，乐府皆传汉国辞。
朝来马上箜篌引，稍似宫中闲夜时。
日暮惊沙乱雪飞，傍人相劝易罗衣。
强来前殿看歌舞，共待单于夜猎归。
彩骑双双引宝车，羌笛两两奏胡笳。
若为别得横桥路，莫隐宫中玉树花。

卷 139_51

【同武平一员外游湖五首时武贬金坛令】储光羲

红荷碧筱夜相鲜，皂盖兰桡浮翠筵。
舟中对舞邯郸曲，月下双弹卢女弦。
青林碧屿暗相期，缓楫挥觥欲赋诗。
借问高歌凡几转，河低月落五更时。
朝来仙阁听弦歌，暝入花亭见绮罗。



池边命酒怜风月，浦口回船惜芰荷。
朦胧竹影蔽岩扉，淡荡荷风飘舞衣。
舟寻绿水宵将半，月隐青林人未归。
花潭竹屿傍幽蹊，画楫浮空入夜溪。
芰荷覆水船难进，歌舞留人月易低。

卷 139_52

【题茅山华阳洞】储光羲

华阳洞口片云飞，细雨濛濛欲湿衣。
玉箫遍满仙坛上，应是茅家兄弟归。

卷 139_53

【寄孙山人】储光羲

新林二月孤舟还，水满清江花满山。
借问故园隐君子，时时来往住人间。

